

# فضيحة من العيار الثقيل: "قناة السويس" تحولت عالميا إلى "قناة المارلبورو"



الأربعاء 10 مايو 2017 11:05 م

في فضيحة من العيار الثقيل لدولة الانقلاب، كشف منشور لضابط بحري مصري، عن تحول اسم قناة السويس عالميا بين البحارة إلى قناة "المارلبورو" نسبة لنوعية من السجائر يطلبها مرشدو هيئة قناة السويس من السفن المارة بالقناة على سبيل "الإتاوة".

وقال الضابط البحري "أمين وهبة"، والذي يصف نفسه بأنه "سيساوي" عتيدي، إن الإتاوات لا تتوقف فقط على السجائر، ولكنها تصل لطلب المكسرات، التين المجفف، والفاكهة، وغيرها، ويحدث ذلك من مرشدي القناة الصغار والكبار، من أصغر رتبة وحتى لواء]

## تفاصيل الواقعة كما جاءت في منشور "أمين وهبة":

«كنت معدي من قناة السويس النهاردة والمفروض ان الواحد يكون مبسوط وفخور ببلدي وقناة السويس وهو معدي اهم ممر ملاحي في العالم مع طقم اجانب ولكن اللي حصل اني بقيت عمال اقول ياريتني ما عديت ولا اعدى من قناة السويس تاني خالص بسبب مرشدين هيئة قناة السويس الى مقدرش اقول عليهم غير حسبي الله و نعم الوكيل من رئيس الهيئة اللي سايب اشكال ضالة في القناة تسئ لكل مصرية ومصري».

وأضاف: «أول مرشد طلع يدخل المركب من منطقة المخطاف الى اول القناة وهي منطقة قصيرة جدا يعني في حدود ساعة فقط ولما دخل المرشد اول ما طلع طلب من القبطان 6 خراطيش سجائر مارلبورو طبعا علشان هو مرشد قناة المارلبورو ده اسم القناة عالميا بسبب شوية رعاي اللي الاستاذ مهذب مميح مسيبيهم علينا ومحتلين مناصب وتخصصات مش بتعتهم بس عادي هنعترها زي كل حاجة في البلد المهم المرشد خذ اللي هو عايزة ودي مش المشكلة انما المشكلة بقي لما اول مرشد سلمنا للسفاح مرشد القناة "سيادة اللواء" اللي عمري ما شوفت في حياتي نقص ولا بجاحه ولا سفالة ولا حقارة ولا كل الصفات القذرة متجمعة في شخص»

واستكمل: «أول ما طلع سيادة اللواء المرشد بدأ بالأسلوب الرخيص وهو بيتلك للمركب على حاجات اصلا مش موجودة ولما لاقى المركب كولوا تمام الحمد لله بدأ يقول للكابتن انا عايز 17 خرطوشة سجائر مارلبورو علشان ميعملش مشاكل للمركب ويدفعها غرامة ويعطلها يعني من الاخر اتاوة المهم اتفقوا على 15 خرطوشة ودي برضوا مش مشكلة دا الطبيعي بتاعهم انما بعد شوية سيادة اللواء المرشد طلب ياميش رمضان وزعل قوي لما الكابتن قالو لسة مجبتش فقالو ازاى معندكش وانت عندك ضباط مصريين لا انت عندك وانا عايز ياميش رمضان علشان ياخذو البيت».

وقال أيضًا: «بعد كذا ادي الكابتن عينة فسدق وعينة حبهان والله العظيم جايب معاة حباية وحباية واداهم للكابتن وقالو انا عايز من دة للبيت

بعد شوية طلب تين مجفف و طلب اللنش بتاع هيئة قناة السويس علشان يجي ياخذ الغنيمة بتاعتو اللي اتحصل عليهم ووصل اللنش اللي طالع يلم الغنائم وبعد كذا هيوديه للمرشد لحد البيت واتفقو انو هيداسب اللي هيوصل الغنائم لحد البيت ولما وصل اللنش فا السجائر محطوطة في كيس قمامة كبير يقوم سيادة اللواء المرشد بعمل اية فتح التلاجة الى في غرفة القيادة ومفضي اللي فيها في الكيس اللي في الغنائم والله العظيم انا بقيت واقف عمال اقول يا ارض انشقي وابلعيني لما ابقي واقف المصري الى في وسط زمايلي الى معايا اللي من سبع جنسيات مختلفة والحقير سيادة اللواء المرشد الجعان الى عمرة مشاف خير يعمل كذا وعلى فكرة لو حد عارضو هو عندو صلاحية يوقف المركب ويحجز عليها ويدفعها غرامة لا تقل عن 20 الف دولار لي اي سبب هو يقولو الهيئة الفاسدة بتاعتو هتصدقو».

وتابع: «المهم قبل ما ينزل السجائر فا بيقول للقبطان اية رأيك أبيعلك السجائر المفروض السجائر دي اللي هو شاحتها من على المركب

اللى واخذها اتاوة عايز يبيعهها للكابتن تاني وياخد فلوس المهم الكابتن وصل لمرحلة لا تسر تماما ☹️ المهم نزلت السجائر بس السفاح لسة موجود ☹️ شوية وطلع كيس من الشنطة بتاعتو وعايز شوية فاكهة للبيت ☹️ وشوية وجالو العشا فا كان العشاء فيه رز بالخلطة والخلطة فيها مكسرات وشاف المكسرات وبدأ يتعصب بقي عشان الكابتن قالو اننا معندناش مكسرات والرز طلع فيه مكسرات المهم شوية وطلب حاجة ساقعة ياخذها معاة البيت والاغرب بقي كمان عايز مائة معدنية للبيت والله العظيم عمري ما شوفت فى حياتي احقر من الشخص دة فى حياتي واللى بعد ما عمل كل دة قام بيصلي ودى كانت الكارثة بالنسبالى علشان خلي الناس كلهم يقولو همى دول المسلمين ☹️ لعنة الله عليك يا سيادة اللواء المرشد»

وختم: «علشان حضرتكو تعرفو حاجة المركب دافعة رسوم عبور القناة حوالي 350 الف دولار غير شوية مصاريف تدخل فى 20 الف دولار يعني هيئة غنية بس جايبة شوية سفاحين مسيبتهم يفضحو مصر اكثر ما هي مفضوحة ☹️ اسف على الاطالة بس حبيت انقل صورة من صور الفساد اللى فى البلد  
#أمين\_وهب .. ظابط بحري شاب , ومؤيد سيساوي عتيد !

---